



Sector comercial aportando na Carnaval 60

S.A.C. contento cu PwC como partner pa eventonan cu hurado



ORANJESTAD - Diabierna a tuma luga e firmamento di un acuerdo entre Stichting Arubaanse Carnaval (SAC) y PriceWaterhouseCoopers (PwC) encunto tur evento unda cu SAC ta haci uzo di hurado pa determina e ganadonan. E conteo di punto ta algo delicado semper y SAC ta contento cu pa esaki por conta cu e apoyo di un compania di renombre manera PwC como partner pa un proceso profesional y mas transparente posibel. Presidente di SAC, Tecla Kelly a comenta cu tur aña SAC ta haci tur esfuerso pa e contamento di puntonan di hurado bay mas profesional y mas transparente posibel. Esaki ta un trabou grandi y importante pa nos Carnaval y tambe di hopi responsabilidad. Kelly ta splica. Pa Carnaval 60 SAC y e compania di accountancy a acerca otro un biaha mas y SAC ta contento cu nan a yega na un acuerdo di cooperacion. SAC ta gradici director di PwC Aruba, Ing. Drs. Edsel Lopez RA, pa a tuma e encargo aki. "Ta hopi great, pasobra den pasado nos a wordo

asisti pa PwC, el a bay hopi bon," Kelly a bisa, añadiendo cu ora un organisacion tin un bon experiencia e ta facil

pa traha cu hende y pa acerca nan pa un colaboracion atrobe.

E team di PwC lo cuminsa

traha hunto cu SAC den hurado como esunnan cu ta controla e puntonan, haci conteo y produci e resultado final durante e competencia di Prins y Pancho, Tumberito, Tumba y Calypso y Roadmarch Infantil y Hubenil y na eleccionnan di Reina Infantil, Hubenil y Grandi, Señora Carnaval y Reina Multicultural. Carnaval di Aruba a nace na aña 1954 caba, como tal e aña aki nos ta celebra 60 aña cu anualmente pueblo ta bini hunto pa muestra nos creatividad, ambiente y folklore manera nos so por. Na

aña 1955 varios club y districtonan a bini hunto pa organisa e carnaval y di ey nan a eligi e prome Reina di Carnaval. E parada grandi tradicional a cuminsa desde aña 1957. Pero tabata dia 11 di november 1966 (11-11-66) pa 11:11am cu a funda Stichting Arubaanse Carnaval, SAC. Desde e tempo ey e fundacion, forma pa un grupo grandi di boluntarianan cu hopi entusiasmo, ta traha duro pa organisa e diferente eventonan cu ta atrae un publico grandi di nos mesun ciudadanonan pero tambe turistanan. □

